

**Shafie: Umno, BN mampu tawan negeri Pakatan
Malaysiakini.com
May 29, 2011**

Umno dan BN mampu menawan semula negeri-negeri yang dimenangi Pakatan Rakyat sekiranya semua anggota parti bekerja keras untuk parti dan tidak melebihkan kepentingan peribadi.

Naib Presiden Umno, Datuk Seri Shafie Apdal berkata, kekalahan BN di beberapa negeri pada pilihan raya umum lebih dilihat kepada kegagalan jentera parti bekerja keras selain masalah berebut untuk menjadi calon yang akhirnya menimbulkan perbalahan sesama sendiri.

"Umno akan hilang kuasa jika ahli dan pemimpin lebih mementingkan jawatan daripada perjuangan membela rakyat. Pilihan raya akan datang ini menjadi satu ujian kepada ahli supaya bersatu dan merebut kembali kerusi yang telah ditawan pembangkang.

"Jika ahli-ahli Umno bekerja keras, tidak mustahil Umno akan dapat merampas semula kawasan tersebut", katanya ketika berucap pada majlis perasmian mesyuarat perwakilan Umno bahagian Kuala Krau, di Temerloh, hari ini.

Beliau yang juga Menteri Kemajuan Luar Bandar dan Wilayah berkata, orang Melayu perlu sedar bahawa hanya Umno sahaja parti yang memperjuangkan nasib bangsa, agama dan negara ini selama ini.

- Bernama

Copyright © 1999-2007 Mkini Dotcom Sdn. Bhd
<http://www.malaysiakini.com/news/165442>